

Ud  
8383



Ud 8383

80



Biblioteka Jagiellońska

Ad.: Ud 8383

1837. 1787



AD EPISTOLAM SYNODI  
WARSAWIENSIS,

Qva ab Illustrissimis & Reverendis  
D.D. Episcopis, Dissidentes in rebus Fidei ab Ecclesiâ  
Catholico-Romanâ, in Regno Poloniæ Magnos Ducatu  
Litvaniz, ad amicum congressum, & Fraternali  
reconciliationem Thorunium  
invitantur:

*Sicut & ad subsequutum*

SACRÆ REGIÆ MAJESTATIS

*Ad eosdem Dissidentes eodem in negotio*

DIPLOMA,

Ordinum Evangelicorum

RESPONSIO

---

Anno M D C XLIV.



Illustrissime & Reverendisime Archiepi-  
scope Gnesnensis, Regni Primas, Primeq; Princeps, ceteriq;  
Illustrissimi & Reverendissimi Regni & M. Duc. Lithv.  
Episcopi, Domini & Amici ac Fratres Nostri  
observandissimi.

**P**osteaquam rumor de Colloquio in Causa Religionis  
inter Dissidentes, ex Sententia Synodi Warsaviensis,  
Anno praterito celebratae, incundo, per Poloniam  
Lithvaniamq; spargi capit, cum omnium hominum animos  
novitate rei tactos reddidit, tum in Evangelicis (prout illi  
quibus aliquid dolet, in spem & metum prompti esse solent)  
spem geminam excitavit. Aut tempus sub altero felicissimi  
Vladislaviani Imperij Decennio imminere, quo iterum  
Deus ampliore viam in Patria nostra aperire velit illi  
caelestis suae Veritati, ad cujus inermem sonitum tot Reges &  
Regna, tot Principes & Ditiones, tot Episcopi & Ecclesia  
olim steterunt, & soli Deo sponte dederunt gloriam, quot  
ullis armis, aut exercitibus, aut cadibus, ad Religionem com-  
pelli invitos potuisse, nulla unquam aetas memoravit. Aut  
saltem illud venisse tempus, quo prudentissimus Senatus  
Ecclesiasticus ad sacra Juramenta Regum, ad Generales  
Confirmationes Jurium, & ad unanimes Ordinum Confoe-  
derationes respiciens, cogitet & meditetur, eas a neglectu  
vel senio, quod contraxisse videntur, vindicare, & in Evan-  
gelicos, toto hoc seculo nullo jure fatigatae Patriae reos, di-  
versis potius patientiae experimentis fatigatos, abundantio-  
ra Paterni & Fraternalis affectus sui, testimonia effundere,  
placidioremq; rebus eorum concedere temperiem. Sed cum  
A 2 jam



jam ipsa Invitatio, nomine Illustrissimarum & Reverendiss.  
 D. D. Vestrarum scripta, in lucem prodiret, illicd ipsa ejus-  
 dem, praesertim illa, quae Vilnae facta est, publicatio, spes  
 nostras labefactare, & pro illis hanc cogitationem pectori-  
 bus nostris incutere cepit, ne forte eo res deducatur, Con-  
 scientiarum Libertate exuti, ad Ecclesiam, cui Majores No-  
 stri justissimas ob causas renuntiaverunt, quoquo modo retra-  
 hamur. Nam cum Illustrissima & Reverendissima D. D.  
 Vestrae, aequa Judicii lance negotium id expenderint, animad-  
 vertent in Patria nostra ad literas solam Authoritate Senatûs  
 Ecclesiastici emissas, in causa Religionis comparere, rem sa-  
 tis per se esse novam, & praesudicio non vacuam, ideo saltem  
 molliori, moribusque libertatis convenientiori modo, Nobis in-  
 timandam fuisse, judicabunt. Accedit, quod ex ejusmodi  
 Invitatione, tam pius in reducendis nobis ad Ecclesiam Ro-  
 manam in quorundam animis exarserit zelus, ut talem con-  
 tra nos, Vitamque, Libertatem & Securitatem nostram, nisi  
 nos reduci pateremur, sub clypeo Authoritatis Vilnae evul-  
 garint Libellum, qualis non ab hominibus in Patrijs Le-  
 gibus perfunctorie (quod etiam in bonis tolerandum quan-  
 do est,) versatis, sed Patriarum Legum prorsus inimicis,  
 proficisci debuit. Summam ergo aequitatem & integrita-  
 tem Vestram, Illustrissimi & Reverendissimi Patriae nostrae  
 Antistites, appellamus, an potuerit Nobis alia tum mens esse,  
 quam quae liberis & pari Vobiscum sanguine cretis homi-  
 nibus esse debuit, ut nimirum aut taceremus ad literas, aut  
 denegaremus Nostri praesentiam? Sed provida S. R. Maje-  
 statis, Dni. nostri Clementissimi, Pietas & sollicitudo, in re-  
 medium

medium ejusmodi doloris & contemptus Nostri subsecuta est;  
 Cujus Literas Regias Vilnae, Mense Martio scriptas, &  
 postea typis vulgatas, cum alij Nostrum praeterito Mense  
 Junio, alij subsequente Julio, nacti essent, nec aequum, nec  
 amori & obsequio, Nostro in Patrem Patriae Nostrae consen-  
 taneum, esse duximus, si coram Sua Majestate Fidei & Re-  
 ligionis Nostrae rationem reddere hac occasione recusare-  
 mus. Communicatis igitur, quantum angustia temporis fe-  
 rebat, non quantum Rei magnitudo postulabat, inter Nos sen-  
 tentijs, ad diem D. Bartholomaeo sacrae, ex Majori Minoriq;  
 Polonia & M. D. L. huc Orlam convenimus; ut tum Regi,  
 Domino Nostro Clementissimo, tum Vobis Amplissimi Praesules  
 unanime a Nobis daretur Responsum. Cum verò Regiae Ma-  
 jestati omnes Nostras rationes plenissime (prout ex adjuncto  
 literarum exemplari patet) exposuerimus, idcirco Illu-  
 strissimis D. D. Vestris satis in iisdem Nos respondisse arbi-  
 trati, Eas prolixitate seorsum responsi non onerabimus: sed  
 per omnia, tam universae Christianitatis, quam Patriae, quae  
 Vestram Nostramque complectitur salutem, sacra; & per illa  
 magnae functionis Vestrae Nomina in S. Scripturis radiantia,  
 oramus & obtestamur, ut post Gloriam Dei, Pacem & Tran-  
 quillitatem, & Libertatem Patriae, more Majorum, con-  
 servetis & tucamini: alienissimumque a sancta Vestra Functione  
 statuatis, de eorum praesudicij cogitationes & Consilia susci-  
 pere, qui pari Vobiscum fide & integritate, Vestris inoffensis  
 Dignitatibus, pro Regibus & pro Repub. ubique steterunt. Hoc  
 quoque peculiariter a Vobis Illustrissimi & Reverendiss. Dni.  
 obnixè petimus, ut illa gravamina, quae jam in Judicij



publicis, in causa Religionis in exemplum abierunt, eâ quâ possunt Authoritate coërcere, & in Urbe Vilnensi (ubi nos vexandorum Evangelicorum quæri & seri prætextus, hic Orlæ certiores facti sumus) turbas & violentias Pietate & Consilio suo antevertere & inhibere velint. Sic nos in honore & observantia Dignitatis Vestræ, sic in studijs & obsequijs, quæcunq; à nobis Ordini Vestro reddi possunt, magis perseverabimus: Sic Vobis Patria & Posteritas laudem conservatæ Pacis publicæ debeat: Sic nomini Vestro exteræ Gentes assurgent, & felicitis Prudentiæ Vestræ Exempla, si non imitari, certè in tacito pectore admirari & venerari cogentur: Sic totus Terrarum Orbis fatebitur, Religiosa bella, alibi ante duo ferè secula exorta, non desisse: apud Nos ne incipere quidem potuisse.

Vale Illustrissime ac Reverendissime Primas, Regniq; Prime Princeps, cum universo Illustrissimorum Episcoporum Collegio. Datum Orlæ 3. Sept. Anno 1644.

Illustrissimarum ac Reverendiss. D. D. Vestrarum Amici & Fratres ad officia & servitia paratissimi

Evangelici ex Tribus Regni & M. D. L. Provincijs, in Conventu Orlensi congregati, quorum nomine subscribit

Janusius Radzivill.  
Director.

SA-

SACRÆ REGIÆ MAJESTATI  
DOMINO DOMINO

VLADISLAO IV. Dei gratia Regi Poloniæ, Magno Duci Lithuaniae, Russiæ, Prussiæ, Masoviæ, Samogitiæ, Livoniæ, Severiensis Smolenscensis, Czernihowiensis, nec non Svecorum, Gothorum, Vandalorumq; hæreditario Regi, Domino, Domino nostro clementissimo:

Nomine Evangelicorum, ab Ecclesia Catholica Romana, in Regno Poloniae & Magno Ducatu Lithuania Dissidentium, ex Colloquio Orlensi per Delegates ipsorum die 24 Aug. habito, Anno Christi 1644. Humilissimi Responsi Libellus.



Molesti procul dubio S. Majestati Tuæ essemus, INVICTIS-SIME REX, vel quod mavis & mereris, OPTIME PRINCEPS, vel quod Tuæ Majestati maximè convenit; MITIS-SIME populorum Tuorum PATER, VLADISLAE, Domine, Domine Noster Clementissime, si ad literas Majestatis Tuæ Vilnæ datas, quas à miseratione Gentium, ob dissidia Religionis sub cladibus belli pereuntium, incipere ad Nos subditos Tuos, voluisti, Responsionem Nostram à celebratione virtutum, & rerum per Te feliciter gestarum, more in alloquendis Regibus usitato, vellemus exordiri. Nempe humilia Majestati Tuæ videntur illa,



la, quæ in Terras Tuas contulisti merita & beneficia : Jam altius assurgis, & quanto pietatis pignore cælum ipsum obligare Tibi debeas, augustâ Tuâ mente, quæ sola tantarum cogitationum est capax, circumversas. Ergo nec Victorias Tuas ex immanissimis partas, nec vitam pertinacissimis donatam, nec Pacem cum præmio belli elatissimis extortam hostibus, commemorabimus; sed Tuæ Bonitatis secuti exemplum, ad acerbissimas vicinorum populorum calamitates seriò sincereq; ingemiscemus. Licet verò ad præsens, quò Europa ardet, incendium, multæ per intervalla annorum causæ concurrerint; originem tamen, aut certè prætextum, à Religione hunc ignem traxisse, nemo est qui ignoret. Cum enim non ratione, sed ferro, non divinis scripturis, sed cruentis edictis, decerneretur; cum non sanitas eorum, qui morbi arguebantur; sed internecio quæreretur; cum alteri dare, alteri perdere nollent, illam, quam solius Dei imperio teneri, Cæsarum & Regum optimi dixere, CONSCIENTIARUM LIBERTATEM: factum est, ut illos vincendi ardor, hos moriendi pro tali causa voluptas, in tam tristes rerum vicissitudines impulerit, ut mæstus & attonitus Christianus Orbis, timere incipiat, nè non cessantibus tantorum odiorum furoribus, mox desinant, tam qui vincere volunt, quàm qui victorum arbitria pati non possunt. Sed jam à retroactis seculis Divina misratio benigniora de patria nostra cogitavit consilia, dum Sacris nostris Regibus Maternæ Divi Parentis Tui stirpis authoribus, tum & popu-  
lis,

lis Eorum imperio subjectis, eam inspiravit mentem, ut & domi Græcæ Ecclesiæ à Latina diversitatem placidissimè ferrent, & foris dura illa avversarentur exempla, quæ in Vicinos, nullius in Deum blasphemiae aut contumeliae, vel tactorum Christianismi fundamentorum reos, sed tantum Ecclesiæ emendationis cupidos (ut ex Catholicis illius & posterioris ævi scriptoribus accepimus) statuebantur. Et licet in gratiam alicujus rigide aliquid sanxissent, nunquam id tamen suo Regali brachio exsequi, vel erroris insimulatos in gremio Reip. quæri, & ad supplicia trahi permitterent. Notamus & id, quòd eo maximè tempore tanto veritatis noscendæ studio exarserint, ut S. Bibliorum Codicem, ante in lingua vernacula vix visum, Anno 1455. Patrio idiomate in usum Sacræ Reginæ scripserint. Postea cum altero seculo totus ferè Mundus in exitium eorum, qui (similem ob causam) ab Ecclesia Romana sese alienaverant, commoveretur; cum Oceano & Adriatico mari adjacentia Regna Concilii Tridentini, primum ex unius autoritate agendi, postea stabiliendi causa, funesta inter se fœdera sancirent; sapientissimus Proavus Tuus SIGISMUNDUS I. & Filius ejus SIGISMUNDUS Aug. R. R. cum prudentissimis Ordinibus non tantum illis nexibus se suosq; implicari noluerunt, sed potius cum viderent sui suorumq; ab illo Concilio parvam rationem haberi, temporibus illis ad asserendam Regum autoritatem, ad lustrandas à Crucigeris (hominum genere religiosissimo) suas ditiones, ad promulgandas  
B  
leges



Leges, brachio Sedis Romanæ ingratas, sed Reip. utiles, deniq; ad permittendam conscientis hominum in Religione libertatem usi sunt. Cùm verò hæc Regum ac Majorum Nostrorum providentia ac moderatio, non satis æquis judiciis traduceretur, adeò Ordines Reip. illa judicia non extimuerunt, ut ultimo Jagellone extincto, cùm Respub. liberrimam de Statu suo statuendi haberet potestatem, non alud Tegumen (vel patrio nostro sermone KAPTUR) salutis & libertatis Univerforum, quàm illam sanctam, & omnibus vicinis invidendam *Pacis & Tranquillitatis Dissidentium in Religione Christiana Confederationem* condiderint, ac Reges Suos non alio annulo, quàm, cui illa inscriberetur, desponsari sibi voluerint; imò ne ulla potestas supra Reges sese attollens tam grande solveret Sacramentum, meministi Rex invictissime, quibus verbis (verba enim illa, procul dubio, non in solo legum codice, sed in Regio quoq; corde Tuo Divino digito insculpta manserunt) in fine Regii juramenti, prospexerint. Quò unico remedio, non armis, non seditione, non post tristia virium experimenta, sed ante omnem dissidii aleam, sponte inter se constituto, non tantum Patriæ, tam vasta Terrarum spatia, tam diversas Nationes, Linguas, Leges, Mores, Ritus, Magistratus, complectentis, orbitatem sub Interregnis, ab omni vi externa tutam, & securam, sed etiam Univerforum Libertatem & tranquillitatem, domi inconcussam retinuerunt: & quod inter arcana Politica censeretur, Religionem

Rom.

Rom. ac Ecclesiasticam dignitatem & eminentiam, quæ nunc alibi sub onere victoriarum Catholicarum ægrè spirat, conservârunt; & non quærendi, sed ex suorum Regum sanguine, qui subditos Religione dissidentes, sed Fide & Obsequio concordēs & pares, paterno affectu complexi sunt, Principem vacantibus sceptris sumendi, genium & consuetudinem liberrimæ Genti instillaverunt. Hæ Polonorum & Lithuanorum fuerunt Artes: hæ Majorum Tuorum virtutes, quibus per integrum seculum Religiosi Belli facem à finibus suis arcuerunt. In quas cum Majestas Tua liberis Dissidentium Religionum suffragiis successisset, parum duxit eas potenter manu tenuisse: (quæ maxima est felicissimi Tui decennii gloria) sed insuper diversos de Sacrisensus conciliare, & ad posteritatem Fidei & Ecclesiæ unitatem transmittere instituit. Magnum opus, & non modò dignitate sed Divinitate Regum, quam Vobis vox Dei communicat, dignum. Sed providendum, Domine Noster Clementissime, ne inde maximas difficultates experiaris, unde minimè expectas. Cui non est ignotum, alteram partem, cùm alios non tantum emendare, sed etiam judicare velit, seipsam ad ullum æquilibrium demittere nolle? Tales quomodo ad justam & legitimam conciliationem permovearis? Conciliatores tanti operis Majestas Tua proponit Reverendissimos & Illustriss. Regni & Mag. Duc. Præfules, Viros in Patria summos, meritis amplissimos: sed an illis juramentum, sedi Romanæ præstitum, in quo



nec Tui, nec Patriæ, nec Legum Reip: ullam legimus mentionem, impedimento ad Colloquium Liberum non sit futurum, iudicio Majestatis Tuæ subijcimus. Insuper Præsidentem Conventus Majestas Tua nominat, Virum Illustrissimum, & non minus Episcopali Senatoriaq; dignitate, quàm probitate morum conspicuū: sed quamvis alteri parti alter concederetur Præsides (quod unicè in ejusmodi congressibus requiritur) quis tertius discordiam eorum compositurus esset? Præsertim si ad Colloquiū non positā certā decernendi de Controversiis Regulā, per Theologos utriusq; partis descenderetur. Nec latet Majestatem Tuam Regiā, quanti minora Ordinum, & Subditorum Tuorum desideria & postulata Romæ quandoq; fuerint habitā. Optimè quoq; novit de ulla etiam minima re, sive decimas, sive præscriptiones, sive commutationes concernente, Illustriss. Archiepiscopum Gnesnensem, licet Legatum Natum, & Primatem Regni, cum universo Illustrissimorum Episcoporum collegio, nullas conventiones, ne quidem cum Catholicis personis, & cum utilitate Ecclesiæ conjunctas, liberā auctoritate inire posse: imò (quod non invidiæ, sed necessitatis causa scribi à Nobis coram Deo protestamur) gratitudinē quam Tuæ Majestati obviis ulnis tota nuper obtulit Respub. inconsultā Sede Romanā de propriis suis reditibus, qui alioquin in liberrima uniuscujusq; Ecclesiastici sunt dispensatione, æqualiter cum Concivibus suis concedere non potuisse: quamvis credamus illos,

ne

ne vitæ quidem & sanguini suo, pro Tua Majestati, parafuros. Nec id adhuc oblivione sepultum, quod Scholas, Ingenia, Typographias, Fora domestica & externa, Comitia, Interregnum, fatigavit: nempe Academia Cracoviensis, tot Legibus & Privilegijs munitæ Libertatem & Pacem, tandem non domi, sed Romæ, tum ab Academicis exorandam, tum Auctoritate Tua Illustrissimiq; Legati Tui prudentiā, vindicandam fuisse. Taceri deniq; non debet, quod Annales nostri loquuntur, quale Responsum ex ore Legati Romani, Regiæ aures, Abavi Tui, D. CAZIMIRI, ob dignitatem Ecclesiasticam præter mentem Summi Pontificis, à Rege collatam audiverint. Hæc & alia, quæ brevitatis causā omittimus, quantula sunt, si cum proposito conciliandæ Religionis, in quo de Capite & Summa rerum necessariò tractandum esset, conferantur? Proinde, nūm alius ex congressu partium prælagiri possit eventus, quam quòd aut ipsi Conciliatores irreconciliabilem Sedem Romanam deinceps essent habituri, aut omnia quæ ab ipsis acta & transacta fuerint, ad unius Bullæ promulgationē evanescerent? Si enim Tridentina Synodus, non ausa est quicquam, sine cōsensu Sedis Romanæ statuere, quomodo Thōruniense Colloquium, sine illo vel hiscere auderet? Dixerit ergò aliquis; Nos Subditos Majestatis Tuæ, Evangelicam Religionem professos, Sanctis Tuis conatibus, per ejusmodi terrores, obicem ponere, ut Nos à reddenda in publico Fidei Nostræ ratione subducamus?

B 3

Ista



Ista quidem Invitatio, quæ Literas Majestatis Tuæ antecessit, (illa præsertim, cui Vilnæ etiam ignominia addita est, & contumeliofo, jugulumq; Libertatis nostræ petente libello, confirmata) ita à Consuetudinibus Patriæ, Gentisq; Nostræ Liberæ Moribus procul abiit, ut nobis justissimam excusationis dare potuisset causam: Sed avertat Rex Regum Deus, ut hoc in subterfugium vertamus: imò per Eum, & per ejus gloriam ad quam & Hominem condidit, & Reges in solijs collocavit, Te Rex Clementissime oramus & obsecramus, ut propositum hoc Tuum, ad solos quidem Subditos Tuos ex Sacro ore Tuo emissum, sed jam universæ Europæ auribus exceptum, magno & constanti animo prosequaris. Memento Te illi Septentrioni regnare, in quo non minùs Libertas quàm Magnanimitas, sæcundum heroi eorum exemplorum nūdum à seculis posuere. Expectabat Terrarum Orbis unde alterum Regni Tui decennium exorsurus esses. Nunc jam audit & assurgit Pietati & Magnanimitati Tuæ, intentus quò evasura sint ista quæ mente præcepisti. Voluit simile Colloquium ante 86. annos D. SIGISMUNDUS AUGUSTUS: prompti erant ad comparandum Majores nostri: sed cur alterius partis autoritate diffutum id fuerit, scripta illo tempore edita loquuntur. At quid impedit iterum id aggredi? Tuæ fortassis Majestati, Tuisq; temporibus, utramq; partem miserabiliter, ut ipse mones, attritam, ad cōsilia Pacis moventibus, hanc Fata reservarunt gloriam,

riam. Tibi ipsa Natalium Tuorum semina suggerunt hanc mentem, ut exemplo Avi & Proavi Paterni, laudatissimorum Regum Sveciæ; Exemplo præterea Jagellonidarum, & fortissimi Stephani, ac Genitoris Tui Optimi & Religiosissimi Principis D. SIGISMUNDI III. R. R. Insuper in augustissima Materna domo Tuâ, exemplo CAROLI V. FERDINANDI, MAXIMILIANI, RUDOLPHI, Cæsarum Aug: sub quibus Reformatio Religionis partim propagata, partim conservata est, non sis adversarius causæ, quæ apud Te diversimodè accusatur. Tibi deniq; Virtutes & Actiones Tuæ, apud utramq; partem rectitudinis & integritatis in hoc difficillimo negotio, fiduciam facient, quòd & suæ Catholicæ Religioni ubiq; satisfeceris, & in diversam, nec in acie, nec in foro gladium Tuum vaginâ eduxeris. Ibimus ergò, Rex Serenissime, quando nos Pietatis Tuæ auspiciū vocaverit. Sed ibimus in conspectum Majestatis Tuæ, Cum enim videamus, nihil per XII. Theologos, imò nec per Episcopos, ob supra scriptas rationes de hac causa, in qua Reformatio Ecclesiæ (sine qua Conciliatio Religionum nulla) tangenda esset, liberè dici posse: Propterea, Regis, non per hominis, sed per Dei gratiam constituti & regnantis, præsentiam imploramus. Illuc cum Illustris. Episcopi, & Venerabiles Theologi, liberas & omni metu solutas Conscientias attulerint, & ad solius S. Scripturæ Regulam, ac primævæ Apostolicæ, Apostolicorumq; discipulorum, & sequentium



trium seculorum Ecclesiæ mores, & instituta, & juxta  
quatuor Oecumenica Concilia, Seq; Nosq; examinare  
& examinari voluerint, coram Tua Majestate, tan-  
quam Uncto Dei, salvis illis, in quibus nati sumus Li-  
bertatibus, causæ Nostræ à principio Reformationis  
nunquam celatæ, aut in tenebris absconditæ, sed sem-  
per & ubiq; in lucem, ac potissimum in conspectum  
Divorum Antecessorum Tuorum productæ, bonita-  
tem, & Majorum nostrorum, qui ab Ecclesia Rom.  
secesserunt, innocentiam, opi Divinæ fidentes, pro-  
baturi sumus. Ut autem vis & fructus salutaris Tui pro-  
positi, in Ditionum Tuarum omnes Subditos, ac in vi-  
cinas Regiones, tali remedio potissimum egentes,  
sefe effundat; humiliter à Majestate Tua petimus, ut  
tanti negotij, sub oculis Majestatis Regiæ tractationē,  
ad proximum Ver aut Æstatem differre dignetur,  
Ita & Illustris. Regni Primati, Illustrissimisq; Episco-  
pis, extraneorum Episcoporum & Theologorum, in  
hac communi Causa, Consilia & Sententias explo-  
randi; & Nosq; quantulæcunq; Subditorum Tuorum  
parti, cum Exteris Ecclesijs eadem Religione junctis  
communicandi, & earum Theologos, ad spectandam  
Virtutis & Pietatis Tuæ Magnitudinem, Salvo Con-  
ductu Regio (Civibus enim & Indigenis Reipub. præ-  
sidio Legum satis prospectum est) evocandi; deniq;  
sefe ad Conventum præparandi & sistendi, tempus  
concedetur. His positis, quandoquidem Majestati Tuæ  
Regiæ, solius gloriæ Dei amplificatio scopus est, ma-  
gnam

gnam spem de Misericordia Dei concipimus, Illum se-  
cundum rectitudinem cordis Tui Regij, & candorem  
Illustrissimorum D.D. Episcoporum omnia largitu-  
rum, & Tuam Majestatem Ordinisq; Reip. in emen-  
danda per Majestatis Tuæ ditiones Ecclesia, legiti-  
maq; & primævis Christianitatis temporibus consen-  
tanea Hierarchia constituenda, pro exemplo Orbi  
Terrarum, Virtute suâ ex Alto adjuturum. Sed ne  
quisquam suspicetur (licet id crassissimæ esset suspi-  
cionis) nos ideo præsentiam Majestatis Tuæ exorare,  
ut si fortè propter gravissima Reipub. negotia præsens  
esse non possit, lucem & conspectum hominum hoc  
prætextu evitemus; ideo adhuc amplius fascibus Cle-  
mentiae Tuæ Regiæ Nos Nostramq; fiduciam humilli-  
mè substernentes, declaramus; Licet accerbissimum  
Nobis liberis hominibus sit futurum, non coram Rege,  
sed coram Præsidibus, rationem Religionis reddere,  
& periculosa finistrarum vel ambiguarum delatio-  
num, aut relationum, aleæ Nos Nostraq; sponte com-  
mittere, nos ne id quidem refugituros; His tamen ju-  
stissimis requisitis prius à Majestate Tua suppliciter  
exoratis. Primò, ut alteri Præsidi, ex nostra parte suf-  
fragijs nostris electo, par à Majestate Tua detur pote-  
stas. Alterum, ut non solum vivâ voce, (cujus magnâ  
vim agnoscimus) sed etiam scriptis, in quibus est effi-  
cacissimum contrà temerè negantes vel affirmantes,  
vel aliorum sefe vertentes, remedium & testimoni-  
um, omnia ea quæ dicentur, parti à parte in Colloquio



exhibeantur. Tertiò, ut prorogatione temporis, prout supra petijmus, clementer concessâ, mensura quoq; ejusdem Colloqvij brevi aliquo temporis spatio determinetur: Nostram enim tenuitatē imparem esse aliorum abundantiaē fatemur. Quartò, ne sibi quisquam aliquid in nos statuendi aut decernendi potestatem usurpet, Deniq; post quemcunq; Colloqvij eventum, ut Nobis æquē ac alteri parti liceat Acta Colloqvij publicare, sine ullo in Autores, in Scripta, in Typographos & Bibliopolas, Legentesq; pœnarum metu. Verum enim verò, si tam justa & paritati Colloqviorum debita, nobis negabuntur; aut si per promulgationem Charitativi Colloqvij non Libertas & Pax Ecclesiæ, nec abusum Emendatio, nec gloriæ Divinæ, sed Autoritatis humanæ vindicatio, quæritur: Id certè nihil aliud foret, quàm si vocaremur, ut instar reorum per Confessionem, Nostros, Majorumq; nostrorum errores ac delicta expiaremus, & portam Rom. Ecclesiæ, quæ ut exeuntibus, ita redeuntibus spontè patet, reſerari nobis peteremus. Quod quidem Nos de Tuæ Majestatis bonitate opinari nefas ducimus: sed multis experimentis contra Nos causamq; Nostram ex levissima occasione præsumi, e doctis, ab adversa fortuna veremur. hic ergò figimus pedem, & Libertatem Nostram in Humilitatem, Jura in precès, Usum & Consuetudinem Immunitatum in Supplicationem vertentes, Majestatem Tuam Regiam, ad genua ejus provoluti, obsecramus. Primò, ut ponat sibi ob oculos, quàm læpe non

læt.

lætata sit Patria Nostra ex illa Orientalium Rituum Ecclesiæ, plerisq; invitis, reductione. Deinde, ut postulet à Nobis vitam, sanguinem, & quicquid ab honestis & in Libertate natis hominibus postulari potest, id alacriter, pari cum Romano-Catholicis Fratribus nostris Fide, Virtute & Exemplo (prout id semper & ubiq; à nobis Majoribusq; nostris, præstitum est) pro Majestate Tua, & pro salute Libertateq; Patriæ, profundemus Hoc verò Majestas Tua de Nobis nunquam à quoquam perſvaderi sibi patiatur, ut vel Vitæ precio contra Conscientiam, & cognitam Veritatem, quicquam admittamus, vel paciscamur. Nemo Nos hinc apud Majestatem Tuam pertinaciæ aut ingratitude acculet, ac si Paternum Majestatis Tuæ affectum nobis liberalissimè in Literis declaratum aspernemur. Qui Nos enim sumus, ut tanti Regis amorem & benevolentiam humiliter non veneremur? At prospicimus, si ejusmodi quale supra petijmus, & quale olim tempore Majorū Nostrorū à Concilio Tridentino nō est obtentum, Liberū Natiōale Conciliū agi non potest, magis expedire, non Nobis solū, sed & Reip. ut hanc quam Regia Majestas suscepit paternā sollicitudine curam, vertat ad averrendas oppressiones, gravamina & præjudicia, quæ pæssim Subditis Majestatis Tuæ juris pretextu, Religionis causâ, inferuntur; & ad conservandam, & manutenendam illam Pacem ac Tranquillitatem, quam Sacro Regio Juramento sponndit. Sic quæ solatia & ornamenta communis in se Patria

Nostra



Nostra complectitur; ea ex Lege aureæ Aequalitatis  
quisq; pro meritis suis à Justitia & Clementia Tuæ  
Majestatis, cor Regis Deo inflectente, expectabit: Si  
vero quid adversi (quod sub justissimo Tuo Imperio  
non metuimus) imminet; Nobis tamen preciosius  
erit in domo Luctus, cum bona Conscientia versari,  
quam in domum gaudij cum pudore & extremi judi-  
cij metu commigrare.

Hæc Serenissime & Potentissime Rex, Dn. Dn. Noster Cle-  
mentissime, ad Literas Majestatis Tuæ Nos Subditi Tui, hic  
Orbz necessario ad communicationem sententiarum, sine qua,  
nec Majestati Tuæ, nec Illustrissimo Senatui Ecclesiastico re-  
sponderi potuit, ex Ordinarijs Trium Provinciarum Synodis  
Evangelicis Deputati, humillimè respondemus; Ac Nos. Salu-  
tem, Libertatemq; Nostram Majestatis Tuæ Clementiæ, & Pro-  
tectioni commendamus & subicimus. Regem Regum preca-  
ti, ut plurimis Imperio Tuo additis Annis, doctes illas, quas in  
Majestatem Tuam, contulit, ad illustrandam Gloriam & Verita-  
tem suam cælestem, & ad terrendos omnes Majestatis Tuæ &  
Patriæ Nostræ hostes, adeoq; ad amplificandam Universi Orbis  
feliciter, convertat. In quorum omnium fidem, humil-  
limas istas Literas, Nobis consentientibus & committentibus  
subscribit,

*Sacra ac Serenissima Majestatis Vestra*

*Fidelissimus Subditus*

&

*Humillimus Servus*

**JANUSSIUS RADZIVIL,**

**Director Conventus,**



27



2.

Gerh. Polen  
426.

op



